

Rěč: Dorosćeni jako dorost

„Sto tysac serbowacych 2100“ – kak daloko smy lětsa dóšli?

Budyšin/Smjerdžaca (SN/mb/MiR). Sto tysac serbowacych hač do wróćicy lěstotka – w loňšim hodownym wudaću našeho wječornika sće přeni raz čitali, zo je so team ZARI w nošerstwje Domowiny z tutym zaměrom do džěła podał. Mjez tym je jeho struktura z jědnaće džělowymi městnami wotpowědnje nadawkam dotwarjena, kotrež su zastupjerjo „syće za regionalnu identitu a serbsčinu“ spočatk nazymnika w Delnim Wujězdze prezentowali. Kajke plody džěło projektneho tema w kooperaciji z regionalnymi rěčnymi motiwatorami ponjese, budźemy hakle za něšto lět pohódnočić móc. Wšo dohromady nastawa ze srědkow změny strukturow za serbski lud něhdze sto nowych džělowych městnow. Nimo nowych akterow je tež wupruwowanych kaž Marek Krawc, kotryž je wot różownika 2021 rěčny docent za dorosćenych w Rěčnym centrumje Witaj (RCW). Wón

sam ma tuchwilu 15 kursow na starosci, w běhu třoch lět je něhdze 150 ludži w našej maćeršćinje tak wukmanił, zo móžeš so z nimi znajmjeńša wo jednorých wěckach wšědneho dnja dorozumić. Wšo dohromady RCW dorosćenym 24 kursow poskičuje: w Budyšinje, Radworju, Pančicach-Kukowje, Konjecach, Kulowje, Wojerecach, Slepom a online. Nimo Krawca wuwučuja Julian Nyča, Jan Breindl, Kryštof Peršin a Walburga Šćapanowa. Zhromadne džěło ze ZARI, tak Krawc wčera na naprašowanje Serbskich Nowin rjekny, jara derje běži. Nětko hromadže wo wosebitych intensiwnych kursach přemysluja.

Hladajo na rěčne wukmanjenje džěci a młodostnych je rozšěrjenje prózdniškeho poskitka Serbskeho šulskeho towarstwa (SŠT) we Wodowych Hendricach kaž tež w Pólskej a Českej dopokaz wuspěšnjeje džěławosće. Do tutoho wo-

bluka słušeja tež olympiada serbsčiny a zetkanja swójbow w Hornjej a Delnej Łužicy a tu wosebje tež rěčne kursy za kubłacych a staršich.

Přewzaće nošerstwa za Serbske kubłanske srjedžišćo LIPA w Smjerdžacej je dalši wusahowacy podawk w džěławosći SŠT zaštych třoch lět. Wšako dze tu tež wo wažny rěčny rum serbskeje Łužicy. Srjedžišćo je so z kehelowanišća pod hołym njebjom na woblubowane zetkanišćo wobydlerjow wuwilo. Najwšelakoriše poskitki za zajimcow wšitkich generacijow su stajnje spěšnje wuknihowane. So wě, zo hlada towarstwu tež jako nošerjey sydom pěstowarnjow a hortow z wjac hač sto kubłarkami a jako zamołwitemu za dnjowu mać w Drježdžanach dosć džěła do rukow, kotrež je SŠT pod nawodom předsydki Kathariny Jurkoweje a jednaćela Andreasa Ošiki dotal suwerenje zmištrowało. ► **Přilopk**